

Director di RDA Alvin Koolman:

Proyecto Citgo Aruba no ta stop y e ta esencial pa Aruba y Venezuela

ORANJESTAD (AAN)—Director di Refineria di Aruba (RDA) sr. Alvin Koolman a reitera cu acento varios biaha, den e conferencia di prensa di Diabierna, tocante e situacion di Citgo Aruba, cu e proyecto aki ta sumamente atractivo y cu ta un proyecto cu no por wordo gestop.

Unico riesgo cu tin ta cu e por wordo poni "on hold" durante henter e periodo di transicion, y esaki nan ta trata di garantiza pa no sosode, pasobra tur hende sa e importancia di dje, y Aruba aworaki ta yuda grandemente den su finanzas y pesey tin trahadornan den e refineria cu actualmente ta activo.

COMO 300 TRAHADOR TA ACTIVO:

Sr. Koolman a indica cu tin un tiki menos cu 300 trahador den e refin-



eria di cual 150 ta empleado directo y 150 ta contratista.

E contratistanan den nan mayoria ta gruponan cu ta bay for di security guard, tin parti di ingenieria y hendenan cu ta haci servicionan special.

Director di RDA tin entendi cu e parti cu ta haci e proyecto mes mester bin nobo, y Diabierna atardi cuater compania, den e parti di fase 2 cu ta un stimacion, ainda no a bin cla cu e aspecto financiero y esey

kiermen cu lo pone esaki on hold y e trabao no ta sigui.

Y e parti cu mester wordo haci cu ta esencial pa e operacion di e refineria lo sigui normalmente.

Te aworaki RDA y gobierno di Aruba en particular, ta sigur cu e parti di financiamiento pa e fase 2 ta continua y mantene e hendenan local na trabao. Te ainda no a haya indicacion cu esey no ta e caso.

Solamente cu mester ta sigur cu OFAC (Office for Assts Control) cu ta e instancia di Merca cu ta haci control compronde cu esaki, pero tambe tin hendenan di e gobierno di Guaido na Merca, cu ta zorg pa esey sosode.

El a agrega, tocante e periodo di transicion di gobierno di Venezuela, cu e grupo di trahador cu a wordo avisa pa bay cas wardando e parti

oficial di gobierno y OFAC, bisa cu Aruba no ta cay bao di sancionnan, cu Aruba ta esencial pa e PDVSA nobo y pa e produccion di crudo pa Venezuela recupera mas pronto posible, y ora esey pasa tur cos lo bira normal y e trahadornan bin bek na trabao.

COMBUSTIBLE PA CONSUMO LOCAL TA SAFE:

Tocante e rumor cu un lider sindical a bisa cu lo pone Aruba plat, sr. Koolman a subraya cu e productonan petrolero pa Aruba tur ta wordo importa, door di FENSA cu ta un compania di RDA. Aruba ta consumi como 700 bari pa dia di cual 3.5 ta fuel oil di WEB y 3.5 ta entre gasoline, diesel y jet fuel pa aeropuerto. E productonan aki no tin ningun motibo pa trece nan na peligro.